

## Awadhi Easy-to-Read Version

Language: अवधी (Awadhi)

Provided by: Bible League International.

Copyright and Permission to Copy

Taken from the Awadhi Easy-to-Read Version © 2005 by Bible League International.

PDF generated on 2017-08-25 from source files dated 2017-08-25.

a1ae5774-2ca2-500b-8aeb-2c74229c4519

ISBN: 978-1-5313-1308-1

## तीमुथियुस क दूसरी पत्र

१ पौलुस कइती स जउन परमेस्सर क इच्छा स ईसू मसीह क प्रेरित अहइ। अउर जेका मसीह ईसू में जीवन पावइ क प्रतिज्ञा क प्रचार करइ के बरे भेजा गवा बा।

२ पियारा बेटवा तीमुथियुस क नाउँ :

परम्पिता अउर हमर पभू मसीह ईसू कइती स तोहे अनुग्रह दया अउर सान्ति मिलइ।

### धन्यवाद अउर उत्साह

३ रात दिन आपन पराधनन मैं हमेसा तोहार याद करत भवा, मई ओह परमेस्सर क धन्यवाद करत हउं, अउर ओकर सेवा अपने पूर्वजन क रीति क अनुसार सुद्ध मने स करत हउं। ४ मोरे बरे तू जउन आँसू बहाए अहा, ओकर याद कइके मई तोहसे मिलइ क आतुर हउं, ताकि आनन्द स भर उठउं! ५ मोका तोहार उ सच्चा बिसवास भी याद बा जउन पहिले तोहार नानी लोइस अउर तोहर महतारी यूनीके मैं रहा। मोका भरोसा बा कि उहइ बिसवास तोहरे भी मैं बा। ६ इही बरे मई तोहे याद देवावत हउं कि परमेस्सर क भेट क ओह जुवाला क जलाइ राखा जउन तोहे सब क मिली रही जब तोह प मई आपन हाथ रखे रहेउं। ७ काहेकि परमेस्सर तउ हमका जउन आतिमा दिहे बाटइ, उ हमका कायर नाही बनवत बल्कि हमका सक्ती, पिरैम, अउर आतमसंयम स भरि देत ह।

८ इही बरे तू हमरे पभू या मोर, जउन ओनके बरे बन्दी बना भवा बा, साच्छी देइ स लजा जिन। बल्कि तोहका परमेस्सर जउन सक्ति बाटइ, ओसे परमेस्सर क सक्ती दुआरा जातना झेलइ मैं मोर साथ द्या।

९ उहइ हमका रच्छा किहेस अउर पवित्तर जीवन क बरे हमका बोलाए अहइ-हमार आपन ओह कीन्ह कर्मन क आधार प नाही, बल्कि ओकरे आपन ओह प्रयोजन अउर अनुग्रह क अनुसार जउन परमेस्सर द्वारा मसीह ईसू मैं हमका पहिले ही अनादीकाल स सऊँप दीन्ह गवा बा। १० परन्तु अब हमार बचावइवाले ईसू मसीह क परगट होइ क साथे-साथे हमरे बरे प्रकासित कीन्ह गवा बा।

उ मउत क अन्त कइ दिहेस अउर जीवन अउर अमरता क सुसमाचार क द्वारा प्रकासित किहे बाटइ।

११ इही सुसमाचार क फइलावइ क बरे मोका एक प्रचारक, प्रेरित अउर सिच्छक क रूप मैं नियुक्त कीन्ह गवा बा। १२ अउर इहइ कारण अहइ जेहसे मई एन बातन क दुख उठावत अहउं। अउर फिन भी लज्जित नाही हउं काहेकि जेह प मई बिसवास किहे हउं, मई ओका जानत हउं अउर मई इ मानत हउं कि उ मोका जउन सऊँपे अहइ, उ ओकर रच्छा करइ मैं समर्थ बाटइ जब तलक उ दिन \*आवइ,

१३ ओह अच्छी सिच्छा क जेका तू मोसे सुने अहा, ओका बिसवास अउर पिरैम मैं, जो मसीह ईसू मैं अहइ ओकर आपन आदर्स सिच्छा बनाए रहा। १४ हमरे भीतर निवास करइवाली पवित्तर आतिमा क द्वारा तू उ सत्य की रच्छा करा, जउन तोहका सऊँप गवा बा।

१५ जइसेन कि तू जानत ह कि उ सभन जउन एसिया मैं रहत हीं, मोका छोड़ ग रहेन। फुगिलुस अउर हिरमुग्नेस ओनहीं मैं स अहइ। १६ उनेसिफुरुस क परिवारे प पभू दया करइ। काहेकि उ कइयउ अवसरन प मोका सुख पहुँचाए रहा। अउर उ मोरे जेल मैं रहइ स सरमान नाही।

१७ बल्कि उ तउ जब रोम आवा रहा, जब तलक मोसे मिल नाही लिहेस, जतन स मोका निरन्तर ढूँढत रहा। १८ पभू करइ ओका, ओह दिन पभू कइती स दया मिलइ, ओ इफिसुस मैं मोरी तरह-तरह स जउन सेवा किहेस ह कउनो तरह स उ सेवा किहेस ओका तू अच्छी तरह स जानत अहा।

### मसीह ईसू क सच्चा सिपाही

२ जहाँ तक तोहर बात बा, मोर बेटवा! मसीह ईसू मैं मिलइ वाली अनुग्रह स मजबूत होइ जा, २ बहुत स लोगन क साच्छी मैं मोसे तू जउन कछु सुने अहा, ओका ओन बिसवास करइ जोगग मनइयन क सऊँप द्या जउन दुसरेउ केउ क भी सिच्छा देई मैं समर्थ होइ। ३ जउन यातना सबइ आवइ ओनका मिलकर सामना करा। जातना झेलइ मैं मसीह ईसू क एक अच्छा सैनिक क समान सेवा करत रहा। ४ अइसे सबहिं जउन सैनिक क समान सेवा करत हीं अपने आप क साधारण जीवन क जंजाल मैं नाही फँसउतेन काहेकि उ अपने सासक अधिकरियन क सुस करई

\*१:१२ दिन अरथ अहइ उठइ दिन जब सबहीं मनइयन क निआव करइ बरे मसीह आइ अउर ओनका अपने संग रहइ बरे लइ जाइ।

क बरे कोसिस करत रहत हीं।<sup>५</sup> अउर अइसेनइ अगर केउ कीहीउ दउडइ वाली प्रतियोगितन मँ हीसा लेत ह अउर नियमन क नमाइन, तउ ओका विजय क मुकुट ओह समइ तलक नाही मिलत, जब तलक कि उ नियमन क पालन करत करत प्रतियोगितन मँ भाग नाही लेत।<sup>६</sup> किसान जो मेहनत करत ह इ उपज क सबसे पहिला भाग पावइ क अधिकारी अहइ।<sup>७</sup> मई जउन बताइत हउँ: ओह प बिचार करा। पभू तोहे सब कछू समझइ क छमता प्रदान करी।

<sup>८</sup> मसीह इसू क खियाल करत रहा जउन मरे हुअन मँ स फिन स जिन्दा होइ उठा ह अउर जउन दाऊद क बंसज अहइ। इहइ ओह सुसमाचार क सार अहइ जेकर मई उपदेस देत हउँ<sup>९</sup> इही बरे मई जातना झेलत अहउँ। इहाँ तलक कि एक अपराधी क नाई मोका जंजीरन स जकड़ दीन्ह गवा बा। परन्तु परमेस्सर क बचन तउ बन्धन रहित बा।<sup>१०</sup> इही कारण परमेस्सर क चुना गवा लोगन के बरे मई हर दुख उठावत रहत हउँ ताकि उ पचे भी ईसू मसीह मँ मिलइ वाली महिमामयी अउर अनन्त उद्धार क साथे मिल सकइँ।

<sup>११</sup> इ बचन बिसवासे क जोगग अहइ कि:

अगर हम ओकरे साथे मरा हई,  
तउ उही क साथे जिउव,

<sup>१२</sup> अगर हम दुख स्वीकार करत अही।

त ओकरे साथे सासन भी करव।

अगर हम ओका छोड़ तजबड,

तउ तजि देइ उहउ हमका,

<sup>१३</sup> हम चाहे बिसवास हीन होइ,

प उ बिसवासी हमेसा-हमेसा बिसवास योग्य बना रही

काहेकि नाही होइ सकत उ आतिमा निसेधी मिथ्यवादी, अपनेन ही बरे।

### स्वीकृत कार्यकर्ता

<sup>१४</sup> लोगन क इन बातन क धियान देवावत रहा अउर परमेस्सर क साच्छी कइके ओन्हे सावधान करत रहा कि उ सब्दन क लइक लड़ाई झगड़ा न करा। अइसेन लड़ाई-झगड़ा स कउनउ लाभ नाही होत, बल्कि एनका जे सुनत हीं, उहउ का नस्ट कर देत ह।<sup>१५</sup> अपने आप क परमेस्सर द्वारा गृहण करइ जोगग बनाइके एक अइसे सेवक क रूप मँ पस करइ क यत्न करत रहा जेहसे कउनउ बात क बरे सरमाई क जरूरत न होइ। अउर जउन

परमेस्सर क सत्य बचन क सही ढंग स उपयोग करत ह।

<sup>१६</sup> अउर अधार्मिक अउर अर्थहीन बातन स बचा रहत ह काहेकि इ बात लोगन क परमेस्सर स बहुत दूर लइ जात ह।<sup>१७</sup> अइसेन लोगन क सिच्छा नासूर क तरह फइले। हुमिनयुस अउर फिलेतुस अइसेन ही अहईं।<sup>१८</sup> जउन सच्ची सिच्छा स भटक गवा हयें। ओनकर कहब बा कि पुरूत्थान अब तलक होइ चुका बा। इ सबइ कछू लोगन क बिसवास क खराब करत हयें।

<sup>१९</sup> कछू भी होइ परमेस्सर तउ जेह केतना ही मजबूत नाँव क डाए अहइ, उ मजबूती क साथे खड़ी बा। ओह प अंकित बा, “पभू अपने भक्तन क जानत ह”<sup>१</sup> अउर “उ हर एक, जउन कहत ह कि उ पभू क अहइ ओका दुस्तता स बचा रहइ चाही।”

<sup>२०</sup> एक बड़ाके घरे मँ बस सोना-चाँदी क ही बर्तन त नाही होत हीं, ओहमाँ लकड़ी अउर मिट्टी क बरतन भी होत हीं। कछू विसस उपयोग क बरे होत हीं अउर कछू साधारण उपयोग क बरे।<sup>२१</sup> इही बरे अगर आदमी अपने आपके बुराइयन स साफ कइ लेत ह तउ उ विसस उपयोग क बनी ह। अउर फिन पवित्तर बनिके अपने सुवामी क बरे उपयोगी सिद्ध होई। अउर कउनउ अच्छा कामे क बरे तइयार रही।

<sup>२२</sup> जवानी क बुरी इच्छन स दूर रहा, धार्मिक जीवन, बिसवास, पिरम अउर सान्ति क बरे ओन्हन सब क साथे जउन सुद्ध मने स पभू प बिसवास करत हीं, पुकारत हीं, कोसिस करत रहा।<sup>२३</sup> मूर्खता स भरा, बेकार क तर्क बितर्क स हमेसा बचा रहा। काहेकि तू जानत ह कि एनसे लड़ाई-झगड़ा पैदा होत ह।<sup>२४</sup> अउर पभू क सेवक क तउ झगड़इ न चाही। ओका तउ सब प द्या करइ चाही ओका सिच्छा देइ मँ जोगग होइ चाही। ओका सहनसील होइ चाही।<sup>२५</sup> ओका अपने विरोधियन क भी विनम्रता क साथे समझइ चाही और परमेस्सर ओनका हिरदइ बदल देइ ताकि ओनका सत्य क गियान होइ जाइ<sup>२६</sup> अउर उ सचेत होइ क सइतान क ओह फन्दा स बचि नकरइँ जेहमाँ सइतान ओनका जकड़ी रखे बाटइ ताकि उ पचे परमेस्सर क इच्छा क अनुसरण कइ सकइँ।

### अन्तिम दिनन

**३** <sup>१</sup> याद रखअ अन्तिम दिना मँ हम पे बहुत खराब खराब समइ आइ। <sup>२</sup> लोग अपसब्द

निकारिहीं, महतारी-बाप क अवहेलना करइवाला, निर्दय, अपवित्तर, <sup>३</sup>पिरेम रहित, छमा-हीन, निन्दक, असंयमी, बर्बर, जउन कछू अच्छा वा ओकर विरोधी, <sup>४</sup>बिसवासघाती, अविवेकी, अहंकारी अउर परमेस्सर पिरेमी होइ क अपेक्षा सुखवादी होइ जइहीं। <sup>५</sup>उ धरम क देखावटी रूप क पालन तउ करिहीं परन्तु ओनके भित्तर सक्ती क नकार देइहीं। ओनसे हमेसा दूर रहा।

<sup>६</sup>काहेकि एनमे स कछू अइसेन हयन जउन घरे मँ घुस पइठि कइके पापी, दुर्बल इच्छा सक्ती क पापसे भरा हर तरह क इच्छन स चलायमान स्त्रियन क वस मँ कइ लेत हीं। <sup>७</sup>इ सबइ स्त्रियन सीखइ क जतन तउ हमेसा करत रहत हीं, परन्तु सत्य क सभन गियान तलक उ कभउं नाही पहुँच पउतिन। <sup>८</sup>यन्नेस अउर यम्बरेन्स तउ जइसेन मूसा क विरोध किहे रहेन, वइसेन ही इ लोग सच क विरोधी अहइ। इ लोगन क बुद्धि भ्रस्ट बा अउर बिसवास क अनुसरण करइ मँ ये असफल हयन। <sup>९</sup>परन्तु ये अउर जियादा आगे नाही बढ पइहीं काहेकि जइसे यन्नेस अउर यम्बरेन्स क मूर्खता परगट होइ गइ वइसे ही एनकइ मूर्खता भी परगट होइ जाई।

### अन्तिम आदेस

<sup>१०</sup>परन्तु, कछू भी होइ मोर सिच्छा क पालन किहे अहा। मोर जीवन की राह, मोरे जीवन क उद्देश, मोर अटल बिसवास, मोर सहनसीलता, मोर पिरेम, मोर धीरज <sup>११</sup>मोर ओन्हन सबइ यातना अउर सबइ पीड़ा मँ मोर साथ दिहे अहा तू तउ जनबई करत ह कि अन्ताकिया, इकुनियुम अउर लुस्त्रा मँ मोक केतँना भयानक यातना दीन्ह गइ रही जेका मई सहे रहेउं। परन्तु पर्भू त ओ सबसे मोर रच्छा किहेस। <sup>१२</sup>उ समइ परमेस्सर क इच्छा क अनुसार जउन जिअइ चाहत हीं, सतावा ही जइहीं। <sup>१३</sup>परन्तु पापी अउर टगन दुसरन क छलत भए अउर खुद छला जात भए खराब स खराब होत चला जइहीं।

<sup>१४</sup>परन्तु तू जउने बातन क सीख्या ह अउर मान्या ह, ओन्हे करत जा। तू जानत ह कि ओह पर बिसवास कइ सकत ह जेनसे इ बातन क तू सीखे रह्या। <sup>१५</sup>अउर तोहका पता बा कि तू बचपन स ही पवित्तर सास्तरन क भी जानत अहा। उ पचे तोहका ओह विवेक क दइ सकत हीं जेका मसीह ईसू बिसवास क द्वारा छुटकारा मिलि सकत ह। <sup>१६</sup>हर एकक पवित्तर सास्तर

परमेस्सर क प्रेरणा स रचा गवा बा। उ लोगन क उचित जीवन का संदेस देत ह। उ लोग क सत्य क सिच्छा देइ ओनका सुधारइ ओन्हे ओनकर बुराइयन दसावइ अउर पवित्तर तथा सुद्ध जीवन क प्रसिच्छन मँ उपयोगी बा। <sup>१७</sup>जउन परमेस्सर क सेवा सारस्तरन क प्रयोग कइ क करत ह सब तरह क अच्छा कामन क करइ बरे तइयार रहब अउर हरेक नीक काम क करइ बरे जरूरत क हर एक चीज ओकर लगे होइहीं।

<sup>१</sup>परमेस्सर क साछी कइके अउर मसीह ईसू क आपन साछी बनाइ क जउन सर्वाहि जिअत अउर जउन मरि चुका बाटेन, ओनकइ निआउ करइवाला अहइ, अउर काहेकि ओकर फिन स आगमन अउर ओकर राज्य लगे बा, मई तोहसे सपथ स हुकुम देत हउं। <sup>२</sup>सुसमाचर क प्रचार लगातार करा। चाहे तू पचन क सुविधा होइ या असुविधा आपन कर्तव्य करत रहा। लोगन क का करइ चही, ओनक समझावा। जबहि उ पचे बुरा काम करइ ओनका समझावा लोगन क धीरज दइके समझावत भए ओनका प्रोत्साहित करइ चाही। यह सब धीरज और सावधानी स दी गइ सिच्छा द्वारा करा।

<sup>३</sup>मई इ एह बरे बतावत हउं कि एक समइ अइसा आई जब लोग अच्छा उपदेस क सुनब तक न चइहीं उ आपन इच्छन क कारण अपने बरे बहुत स गुरू एकटठा कइ लेइहीं, जउन उहइ सुनइहीं जउन उ पचे सुनइ चाहत हीं। <sup>४</sup>उ पचे आपन कानन क सत्य स फेर लेइहीं अउर कल्पित सबइ कथा प धियान देइ लगीहीं। <sup>५</sup>परन्तु तू निस्चय स सब परिस्थितियन मँ संयमी रह्या, सबइ यातना झेला अउर सुसमाचर क प्रचार क काम करा। जउन सेवा तोहका सऊँपी गइ बा, ओका पूरा करा।

<sup>६</sup>जहाँ तक मोर बात बा, मई तउ अब अर्ध क समान उँडेला जाइ पर हउं। अउर मोर तउ एह जीवन स विदा लेइ क समइ भी आइ पहुँचा अहइ। <sup>७</sup>मई उत्तम स्पर्धा मँ लगा रहा हउं। मई आपन दउड़-दउड़ चुका हउं। मई बिसवास क रास्ता क रच्छा किहे हउं। <sup>८</sup>अब विजय मुकुट मोर प्रतिच्छा मँ बा। जउन अच्छे जीवन क बरे मिलइ क बा। ओह दिना निआउ कर्ता पर्भू मोका विजय मुकुट पहिराई। न केवल मोका, बल्कि ओन्हन सभन क जउन पिरेम क साथे ओकरे परगट होइ क बाट जोहत रहत हीं।

### निजी सनेस

१ मोसे जेतना जल्दी होइ सकइ, मिलइ आवइ क पूरी जतन करा। १० काहेकि एह जगत क मोह मँ पड़िके देमास तउ मोका तियाग दिहे अहइ अउर उ थिस्सलुनीके चला गवा बा। क्रसकंस गलातिया क अउर तीतुस दलमतिया क चला गवा बा ११ केवल लूका ही मोरे लगे बा। मरकुस क लगे जाब अउर जब तू आवा, ओका अपने हाथे लइ आवा काहेकि मोर काम मँ उ मोरे बहुत सहायक क होइ सकत ह। १२ तुखिकुस को मई इफिसुस भेजत अहउँ।

१३ जब तू आवा, तउ ओका कोट के, जेका मइँ त्रोआस मँ करपुस क घरे छोड़ि आइ रहेउँ, लइ आवा। मोर कितबियन, विसेस कर चमड़े क चिटिटन क लइ आवा।

१४ ताम्रकार सिकन्दर तउ मोका बहुत हानि पहुँचाए अहइ। उ जइसेन किहे अहइ, पभूँ ओकरे करमन क अनुसार ओका वइसेन फल देई, १५ तूहँ ओसे सचेत रहा काहेकि उ मोर उपदेस क घोर विरोध करत रहा बाटइ।

१६ मुरू मँ जब मइँ आपन बचाव पेस करइ लागउँ तउ मोर पच्छ मँ कउनो सामने नाही

आवा। बलिक ओन्हन तउ मोका अकेलइ छोड़ि दिहे रहेन। परमेस्सर करई ओन्हे एकर हिसाब न देइ पड़इ। १७ मोरे पच्छ मँ त पभूँ खड़ा होइके मोका सकती दिहेस। ताकि मोरे द्वारा सुसमाचार क भरपूर प्रचार होइ सकइ, जेका सभन गैर यहूदियन सुनि पावई। सिंह क मुँह स मोका बचाइ लीन्ह गवा बा।

१८ कीहींउ पाप क भारी हमला स पभूँ मोका बचाई अउर अपने सरग क राज्य मँ सुरच्छा स लइ जाई। ओकर महिमा हमेसा हमेसा होत रहइ। आमीन।

### पत्र क समापन

१९ पिरस्का, अक्कला अउर उनेसिफुरूस क परिवार क नमस्कार कहया। २० इरास्तुस कुरिन्थुस मँ ठहर गवा बा। मइँ तरुफिमुस क ओकरी बीमारी क कारण मीलेतुस मँ छोड़ दिहे अहउँ। २१ जाड़ा स पहिले आवइ क जतन करा।

यूबुलुस, पुदेंस, लिनुस अउर क्लौदिया अउर सभन भाइयन क तोहे नमस्कार पहुँचइ।

२२ पभूँ तोहरे साथे रहइ। तू सब प पभूँ क अनुग्रह होई।